

FISI NA CHUI



Kimotho G. Gabriel

Kimechapishwa na:
Starlink Translation Centre
P.O. Box 241-00600 Nairobi

© Kimotho G. Gabriel, 2017

Haki zote zimehifadhiwa. Hairuhusiwi kuiga, kunakili, kupiga chapa, kutafsiri au kukitoa kitabu hiki, kwa jinsi yoyote ile, bila idhini, kwa maandishi, ya Kimotho G. Gabriel.

Chapa ya kwanza 2017

ISBN 978-9966-1979-7-9

Michoro imechorwa na Abraham Ngume
Kurasa zimeruwazwa na Puritan Designs

Hapo zamani za kale, Fisi alimpenda bintiye Chui. Urafiki huu ulikuwa wa miaka mingi sana. Nia yao ilikuwa ni kufunga ndoa. Urafiki huu ulikuwa wa kisirisiri na Chui hakuufahamu. Fisi alikuwa akimngoja bintiye Chui akienda mtoni na kumsaidia kuubeba mtungi wake



wa maji. Tendo hili lilimfanya kupenda sana kuteka maji. Fisi naye alijitahidi na kumwonyesha mapenzi makubwa. Bintiye Chui alikuwa ameridhika na urafiki huu. Alimpenda Fisi sana. Aliona ni heri waishi pamoja.

Siku moja Fisi alimwambia kwamba atamposa baada ya wiki moja. Binti ya Chui alifurahi mno. Aliwaambia wazazi wake kuwa alikuwa na mgeni ambaye angekuja kumtembelea. Alikataa kata kata kuwaambia rafiki yake alikuwa nani. Aliwaambia kwamba ingekuwa vizuri wamwone siku hiyo.

Fisi naye alikuwa na furaha si haba. Alienda kwa Sungura aliyekuwa jirani yake na akamweleza kuhusu safari iliyokuwa mbele yake. Alimtaka Sungura



aandamane naye ili aonekane kama mstaarabu. Sungura alikubali kumpeleka.

Siku zilizofuata, Fisi alikuwa anaoga na kuzichana nywele za ngozi yake. Alipendeza kweli. Sungura alipomwona alishangaa. Hakutarajia kwamba Fisi

anaweza kurembeka vile. Aliona wivu
kwa kuwa hata yeye hakuwa na mke.
Alimwambia Fisi kwamba nywele
kubwa haikuwa nzuri na wakwe
zake wangemwona kama mwizi. Fisi
alikubaliana na Sungura na akampa
makasi amnyoe.



Sungura alimnyoa kiholela holela. Fisi alikaa vibaya mno. Sungura alitabasamu na kumwambia Fisi kwamba sasa alikuwa mzuri kabisa na wakwe zake wangemfurahia.

Siku ya kwenda, Sungura alijikwatua vizuri mno. Alionekana maridadi sana. Alibeba bakora na mgwisho. Fisi alipomwona, aliona kwamba hata yeye alihitaji vitu vile. Alikata tawi la mti na kuutumia kama bakora. Hakujua kule ambako angetoa mgwisho. Pia walibeba aina fulani ya vijiti vidogo vya mti wa mchai ambavyo hutumika katika kuambulia viazi vitamu. Walipokaribia, Sungura alimwambia Fisi kuwa wakionekana na vijiti vile wangeonekana walafi. Kwa hivyo waliagana kuvitupa.




Lakini badala ya Sungura kutupa wake, aliuficha kwenye manyoya yake yaliyokuwa yamechanwa vizuri.

Walipofika, walikaribishwa vizuri.
Waliletewa uji kwa bakuli kubwa.
Walikunywa vizuri halafu wakaletewa
viazi vitamu. Sungura alimwambia Fisi
kuwa aendee vile vijiti waliotupa ili
waweze kuambulia viazi vitamu. Fisi
alitoka mbio. Naye Sungura mara akatoa
kijiti chake na kula viazi vyote vitamu.
Mara mvua kubwa ikanyesha. Binti Chui
alifika na kutaka kujua alipokuwa mpenzi
wake. Sungura alimwambia kwamba
alikuwa ameendea kofia yake.


Fisi aliporudi, alikuta kwamba
sahani na sinia za chakula zilikuwa
zimeondolewa. Alikuwa amechoka na
alikuwa na njaa. Sungura alimpa pole na
kumwambia kwamba angojee kiamsha
kingywa keshowe. Usiku huo fisi alilala
fofofo kwa sababu ya uchovu.

Sungura aliamka usiku wa manane
na kuingia bomani walikowekwa kondoo.
Alimpata kondoo mmoja mnono na
kuukata mkia wake kwa kisu chake kikali.
Aliula ule mkia mbichi kwani ulikuwa



mnofu wa mafuta. Baadaye, alirudi alikolala Fisi na kupangusia kisu chake kwenye midomo ya Fisi. Halafu aliingia kitandani na kulala fofofu.

Asubuhi waliamshwa na kelele ya Chui. Chui aliteta sana akiuliza ni



nani amemkata kondoo wake mkia. Walipoamka na kutoka nje, walishangaa kumwona kondoo aliyekuwa akitokwa na damu. Chui aliwaeleza kwamba huyo kondoo alikuwa achinjwe asubuhi. Fisi alishangaa alipomwangalia yule kondoo. Aliuliza ni nani anayeweza kunyemelea boma la Chui na kutenda kitendo kiovu vile. Sungura aliwaambia kwamba alimsikia Fisi akitoka nje usiku lakini hakujua alikokwenda.

Chui alipomwangalia Fisi vizuri, alimwuliza alikoitoa ile damu iliyokuwa midomoni mwake. Fisi hakufahamu alichokuwa anaambiwa.



Bintiye Chui alimpa kioo ajiangalie. Fisi alishangaa sana kuona kwamba mdomo wake ulikuwa umejaa damu. Hata kabla hajafungua mdomo kusema chochote,

Chui alimzaba kofi pa! Alimwambia kuwa ni aibu kubwa kuingia kwa boma ya mwingine kama mgeni na kuanza kujichinja nyama.

Bintiye Chui alimwambia baba yake kwamba fisi ndiye alikuwa mchumba wake. Mzee Chui alishangaa na kufadhaika kwa pamoja. Alimwuliza binti yake vipi angekuwa na urafiki na Fisi ambaye hata heshima hana. Chui alimwambia Fisi akome kabisa kumwangalia na kuongea na binti yake na kuwa urafiki wao umekwisha.

Bintiye chui alifadhaika lakini pia alimchukia Fisi kwa kuukata mkia wa kondoo ya babake. Alishangaa kwa nini Fisi hata hangemngoja ampikie. Alimwambia Fisi amsahau kabisa.

Fisi alijaribu kujitetea lakini ushahidi ulikuwapo, na mwenye macho haambiwi tazama.

Fisi aliondoka huku ameinamisha kichwa kana kwamba sikio moja lilikuwa na uzito zaidi. Alilia sana. Kule nyuma Sungura alimwambia Chui kwamba ingekuwa afadhali amchinje yule kondoo kwa kuwa alikuwa na uchungu mwingi. Chui alikubali. Alipokuwa akimchuna ngozi yule kondoo, Sungura alimshikia miguu huku akimwambia nyimbo nzuri.

Nyama zilichomwa vizuri sana. Sungura aliwachekesha wote kwa nyimbo na mafumbo mengi. Kwa kusema kweli bintiye Chui alianza kumpenda kwa kumwona mchangamfu na mcheshi.



Walikula pamoja. Chui alimwuliza
Sungura akae kwa muda wa siku mbili
zaidi kwa kuwa chakula kilikuwa kingi.

Sungura alikubali kwa moyo mkunjufu. Jambo lililoshangaza ni kwamba, Chui hakumwuliza Sungura alipomwona akicheza na bintiye.

Baada ya siku mbili, mapenzi makali yalionekana kati ya Sungura na binti Chui. Fisi naye alikuwa pale pale njiani akimngojea binti Chui aende mtoni. Fisi alisahau kwamba wakati wa mvua maji hayakuwa haba. Wanyama waliyapata maji mengi nyumbani.

Sungura alimchumbia binti Fisi. Harusi kubwa sana ikaandaliwa. Walialikwa wanyama wote wa mwituni. Siku ya harusi, wanyama wote walikuwa na raha isiyo na kifani kwani chakula kilikuwa



kingi mno. Ilikuwa harusi ya ndovu
kumla mwanawe. Nyani, Mbega na Kima

waliwatumbuiza wageni kwa michezo ya sarakasi.

Fisi alisononeka sana alipomwona Chui akimkabidhi Sungura binti yake. Fisi alikasirika mno na kutoka kwenye harusi na kuapa kulipiza kisasi. Alimtuma Bweha kwa Sungura kumwambia eti mahali watakapokutana hapatamea nyasi. Hadi wa sasa, Fisi angali anamtafuta Sungura ili alipize kisasi.

Maswali

1. Fisi alimpenda nani?
2. Nani alitaka kumposa nani?
3. Kwa nini Sungura alimnyoa Fisi?
4. Sungura alibeba nini?
5. Sungura na Fisi waliandaliwa chakula kipi?
6. Kwa nini Sungura aliukata mkia wa Kondoo?
7. Kwa nini Fisi alizabwa kofi?
8. Nani alimwoa binti ya Chui?
9. Kwa nini Sungura aliimba nyimbo?
10. Nini maana ya Ndovu kumla mwanawe?